



Rabu, 31 Maret 2024

**Ogen: Markus 16:1-7**



Jesus Keke, Beritakenlah!



**P**ernah nge begindu kiniteken bagi perturah dukut? Man kalak si perjuma, tangkas nge itandaina dukut. Kalak si la perjuma pe entah mesunah nge akapna nandai dukut. Uga kin biakna perturah dukut e? Dukut, aminna pe iruah, seminggu enggo ka reh dukut si mbaru. Aminna pe isemprot pake racun rumput, kerah ia, seh mate pe, tapi telu minggu nari enggo ka turah. Amin pe idedeh nahe jelma entah igiling ban motor, mbulak ngenca ia, pagina enggo ka keke. La mesunah mbeneken dukut.

Kiniteken bagi perturah dukut e teridah i bas Maria magdalena, Maria nande Jakup ras Salome. Amin Jesus enggo mate i kayu persilang, la e erbahan surut kinitekenna, entah lawes nadingken Jesus. Seh ku wari Minggu erpagi-pagi Lenga jelas man bana kai si terjadi nandangi Jesus tapi usur-usurna erdalan. Sura-surana naruhken bunga bagi semal ilakoken kalak Jahudi adi mbaru denga si mate e ikuburken. I bas perdalanenna, nungkun-nungkun ukurna, dengen ercacak-cakap ia teluna, ise kari nggulingken batu penutup kubur Jesus. Aminna pe ia bingung, tapi usur-usurna. Jumpa pe tantangan la e erbahansa ia ngadi, iteruskenna saja erdalan. Seh me i kuburen Jesus, iidahna enggo talang pintu kubur Jesus. Batu ndai enggo terguling. Kai ndai si ikebiarkenna la jadi. Lanai perlu ia si nggulingken batu. Iperkuanken malaikat Tuhan ia ras nuruhsa lako erberita nandangi kai si enggo iidahna man ajar-ajar sideban.

Kiniteken e adi iusur-usur, lit ulih si mbelin. Lit kuasa si la ngasup kita ngukurisa, si nampati kita ngalaken persoalenta. Si perlu e me beritakenlah, maka Jesus e enggo keke.